

康熙族譜

遡山之祖者必本於崑崙遡水之源者必本於星宿由是而爲五嶽爲四瀆其大宗也至於鴈宕峩眉洞庭彭蠡名山大川布列宇內者其分派也譜之作也所以記祖若宗所自來稽子若孫所自出正統系辨名分百代爲昭傳之勿替者也楊氏世爲宏農子雲好奇創而別以天水名郡其實皆虞叔之裔爾自黃云以玉環賜楊寶且命之曰令爾子孫潔白累世公卿嗣後宏農天下之族寢以蕃大厯漢晉隋唐宋太尉侍中而外公侯將相不絕如縷而有明初年稱相業者首推三楊可不謂隆盛者乎吾友楊君文字系本宏農而家世

長沙卽以長沙爲漆沮之地亦猶鴈宕峩眉洞庭彭蠡之於五嶽四瀆也其先君子積行累仁樂善不倦綿及瓜瓞長幼尊卑生齒成聚孝弟力田者有人賢良方正者有人遂爲熊湘世族高曾_采獲尙有存者獨是癸未之亂家乘毀於秦火篇帙放失統系幾不可攷楊君以一族之望長而且賢告於家廟謀於同姓毅然起而任修明之責自始傷以迄數十傳羣昭羣穆序次嚴整若列宿之分野不可亂也自斬衰以迄期功爲親爲殽品節詳明若彙系之定律不可瀆也自一本以迄支庶或散處各里或遷居友邦網羅悉備若百川之滙海無所遺也茲之修家乘也欲令觀之者知前人望茶陶

人之勞則興創業艱難之思知後人螽斯麟趾之盛則動本
本水源之感知祖祠名號之所存坊墓之所在則春秋之祭
掃心虔而奕葉之稱謂不紊孰謂家乘之修明非卽史氏編
年紀事之微旨哉仁人孝子之用心固宜如此也詩曰永言
孝思孝思惟則 楊君有焉余樂道其盛舉不敢以不敏謝
也是爲序

時

康熙癸亥人日

古龍城邑人洪謀嘉薰沐拜撰

康熙族譜序

楊姓遍寰區稱最盛矣代有名人指不勝屈其遠者姑不具論明也三楊皆一楚人豪其相業彪炳於今爲烈而文貞公爲尤特著予於康熙十五年丙辰隨營由江右赴星沙師次豫章緬想文貞公之遺範思一造其故里求覲其書香世澤以慰平生誦讀嚮往之志第以軍旅忙思慮啟行竟未獲遂所願迨至十八年長沙恢復予濫叨郡守思振親睦之風於兵火流離之後顧潦倒於軍供簿書而有志未逮焉今解組間居候代偶得楊氏族譜閱之蓋由江右徙居星沙者噫此爲文貞公之同脈與按譜居長沙之麋茅場十二派於此

自明迄今子孫蕃衍且建祖祠於水磯口江岸其元孫楊文
宇諸人今乃克修前業重新祠宇復輯茲譜於兵火之後則
能篤於親睦可知其有愜於予之素志者矣嗟乎族譜之設
非徒爲美觀侈盛事也蓋將考譜而興木本水源之思其譜
中之支派雖疏且遠者皆爲始祖高曾一體之所遺則疏遠
誼同親支於以合遠近而共篤其親睦斯則設譜之意也由
此觀之長沙楊氏來自江右其爲文貞公同脈譜雖未及載
而不可不作木本水源觀也夫子於文貞公尙興高山仰止
之思而爲楊氏之子若孫者能無感而興起與予知長沙楊
氏其必有媲美前烈者也予故取文貞公以爲諸楊勉云是

爲序

時

康熙二十三年歲次甲子小春穀旦

賜進士出身中憲大夫原任知長沙府事晉龍門任紹煥題

楊氏

三魚堂

康熙族譜序

人必有族族必有譜譜者所以明宗法而傳氏族也所以稽親疏而考支派也譜牒之關不綦重乎長沙縣治之西有地鹿茅場楊氏聚族於此其始祖思伯公來自吾鄉撫州金谿大塘傳至於今十有二派子孫繁衍棟宇鱗集禮義廉讓雍雍成風絃誦之聲不絕如縷蔚然南楚鉅姓明中年曾建祠於水磯口江岸立楊公思伯之像而享祀之並遡厥本源鐫成家譜時至滄桑前蹟燬棄今其後嗣文字諸人仁孝天植奮然追感每進伯叔昆弟討論彖乘復徵予文以敘之噫嘻此誠仁人孝子之所爲也洵足風矣嘗考氏族志所載

若旬之爲孫也莊之爲嚴也何之爲韓也此異而同者也狄
武襄之於梁公也郭崇韜之於汾陽也此同而異者也更世
有一父之子同水之源共木之本而使前後失序疎戚殊施
竟以途之人視之指不勝屈也夫異者而同之與同者而異
之途之人而視之皆由於譜之不有譜之不明故也楊氏之
譜一出不獨家乘之賴以綦詳宗族之得以敦睦凡爲世之
子若孫者靡不見此而興感愧之心以起孝弟追遠之念矣
予觀古之大儒學成爲世用將使天下各親其親各長其長
歡然一父之子文字諸人殆深知此義也夫況今楊氏諸少
秀而文者甚多轉盼服官於朝簪纓蟬聯奚可涯量將以

其施之一族者達之天下國家與是爲序

時

康熙甲子仲秋月穀旦

文林郎知醴陵縣事古安城

眷弟唐興邦頓首拜撰

木下三言

三魚堂

康熙族譜跋

嘗聞天子有玉牒所以篤宗藩也下迨卿大夫士庶莫不各有家乘所以正統系辨尊卑彰祖德宗功於前垂統緒詒燕於後者也譜固不重哉昔朱攷亭云史書天地間一大帳簿族譜吾家一小帳簿止要記得清白無侈前人無廢後觀傳百世之子若孫一見悚然有效法有懲戒足矣蘇老泉以族中人歲時蜡社不能相與盡其歡愛稍遠者不相往來乃作蘇氏族譜而後之序譜者咸倣於此焉今楊氏一族家世長沙宗支蕃衍於兵火之後復建祖祠重修族譜其亦與考亭老泉之意有相符者乎夫以羣居聚族之眾支分派別鄉城

散處非必其自相睽離總緣地隔情疎弔慶不與甚之有對
家人而問姓字者其他無論矣自有此修而孰爲期服孰爲
功總孰爲同本異支而親疎以辨自有此修或族中之疎而
賢親而貧者莫不興木本水源之思少而孤老而鰥獨者莫
不有同氣一體之感而恩誼以篤自有此修凡尊而高曾卑
而孫子坐起拜立悉凜凜於分不可踰而僭越者無有也則
齒讓興而孝弟以生且也一家之子若孫其仕不仕者必載
曰配某氏年壽幾某時沒他皆不書以詳其所自也如德行
卓異者必載曰某陰隲品行何若其當身之獲報與昌大其
苗裔者何若將俊秀博學者焚膏繼晷以奮志科名心術端

嚴者樂善好施而力行不倦卓哉楊氏諸君一舉而數善備
其躡武先人嘉惠後啟者亦曷有量哉考亭老泉合而一之
亶其然歟乃若家族之高閥閱萃簪纓與夫楊氏諸君之品
望先君子曾引而序之不禁其辭之複矣姑不復贅余第多
修譜之功不一而足故娓娓乎言之於後也是爲跋

康熙二十三年甲子

龍城後學洪仙年謹識